

摘藻堂四庫全書薈要

經部

欽定四庫全書薈要

經部

詩緝圖說
卷一



欽定四庫全書薈要

詩緝目錄

卷一周南

關雎

后妃之德

葛覃

后妃之本

卷耳

后妃之志

樛木

后妃逮下

采芣

后妃子孫衆多

桃夭

后妃之所致

兔置

后妃之化

采芣

后妃之美

漢廣

德廣所及

汝墳

道化之行



麟之趾

闕
應

卷二 台南

鵲巢

夫人
之德

草蟲

大夫妻能
以禮自防

甘棠

美台
伯

羔羊

鵲巢之
功致

標有梅

男女
及時

江有汜

美
媵

采芣

夫人不
失職

采蘋

大夫妻能
循法度

行露

召伯
聽訟

殷其雷

勸以
義

小星

惠及
下

野有死麇

惡無
禮

何彼襍矣

美王姬

騶虞

鵲巢之應

自關雎至騶虞二十五篇謂之正風

卷三

邶國風

柏舟

言仁而不遇

綠衣

衛莊姜傷已

燕燕

衛莊姜送歸妾

日月

衛莊姜傷已

終風

衛莊姜傷已

擊鼓

怨州吁

凱風

美孝子

雄雉

刺衛宣公

匏有苦葉

刺衛宣公

卷四

谷風

刺夫婦失道

式微

黎侯寓于衛其臣勸以歸

旄丘

責衛伯

簡兮

刺不用賢

泉水

衛女思歸

北門

刺仕不得志

北風

刺虐

靜女

刺時

新臺

刺衛宣公

二子乘舟

思伋壽

卷五

鄘國風

柏舟

共姜自誓

牆有茨

衛人刺其上

君子偕老

刺衛夫人

桑中

刺奔

鶉之奔奔

刺衛宣公

定之方中

美衛文公

蝦蟆

止奔

相鼠

刺無禮

干旄

美好善

載馳

許穆夫人閔衛之亡

卷六

衛國風

淇奥

美武公之德

考槃

刺莊公

碩人

閔莊姜

氓

刺宣王之時

竹竿

衛女思歸

芄蘭

刺惠公

河廣

宋襄公母歸
于衛思宋

伯兮

刺時言君
子行役

有狐

刺男女
失時

木瓜

美齊桓公

卷七

王國風

黍離

閔宗周

君子行役

刺平王

君子陽陽

閔周

揚之水

刺平王

中谷有推

閔周

兔爰

閔周

葛藟

王俗刺
平王

采芣

懼讒

大車

刺周大夫

丘中有麻

思賢
人

卷八 鄭國風

緇衣

公美武

叔于田

公刺莊

大叔于田

公刺莊

將仲子

公刺莊

清人

公刺文

羔裘

刺朝

遵大路

子思君

女曰雞鳴

刺不說德

有女同車

刺忽

山有扶蘇

刺忽

韜兮

刺忽

狡童

刺忽

褰裳

正思見

丰

刺亂

東門之墀

刺亂

風雨

思君子

子衿

刺學校廢

揚之水

閔無臣

出其東門

閔亂

野有蔓草

思遇時

漆洧

刺荒

卷九

齊國風

雞鳴

思賢妃

還

刺荒

東方之日

刺衰

東方未明

刺無節

著

刺時

甫田

大夫刺襄公

盧令刺荒

南山刺襄公

載驅齊人刺襄公

猗嗟刺魯莊公

敝笱刺文姜

卷十魏國風

葛屨刺褊

汾沮洳刺儉

園有桃刺時

陟岵孝子行役思念父母

十畝之間刺時

伐檀刺貪

碩鼠刺重斂

卷十一

唐國風

蟋蟀

刺晉
僖公

山有樞

刺晉
昭公

揚之水

刺晉
昭公

椒聊

刺晉
昭公

綢繆

刺晉
亂

杕杜

刺時

羔裘

刺時

鵲羽

刺時

無衣

美晉
武公

有杕之杜

刺晉
武公

葛生

刺晉
獻公

采苓

刺晉
獻公

卷十二

秦國風

車鄰

美秦仲

駟驥

美襄公

小戎

美襄公

蕙葭

刺襄公

終南

戒襄公

黃鳥

哀三良

晨風

刺康公

無衣

刺用兵

渭陽

康公念母

權輿

刺康公

卷十三

陳國風

宛丘

刺幽公

東門之枌

疾亂

衡門

僖公誘

東門之池

刺時

東門之楊

刺時

墓門

刺陳

防有鵲巢

憂讒賊

月出

刺好色

株林

刺靈公

澤陂

刺時

卷十四

檜國風

羔裘

大夫以道去其君

素冠

刺不能三年

隰有萋楚

疾恣

匪風

思周道

卷十五

曹國風

蟋蟀

刺奢

候人

刺近小人

鵙鵙

刺不壹

下泉

思治

卷十六

幽國風

七月

周公陳王業

鷓鴣

周公亂救

東山

周公東征

破斧

美周公

伐柯

美周公

九罍

美周公

狼跋

美周公

卷十七

小雅

鹿鳴

燕羣臣嘉客

四牡

勞使臣之來

皇皇者華

君遣使臣

棠棣

燕兄弟

伐木

燕朋友故舊

天保

上下報

采薇

遣戍役

出車

勞還率

杖杜

勞還役

魚麗

美萬物盛多能備禮

南陔

孝子相戒以養

白華

孝子潔白

華黍

時和歲豐宜黍稷

卷十八

南有嘉魚

樂與賢

南山有臺

樂得賢

由庚

萬物得由其道

崇丘

萬物得其高大極

由儀

萬物之由各得其宜

蓼蕭

澤及四海

湛露

天子燕諸侯

彤弓

天子錫有功諸侯

菁菁者莪

樂育材

六月

宣王北伐

采芑

宣王南征

車攻

宣王復古

吉日

美宣王田

卷十九

鴻鴈

美宣王

庭燎

美宣王

沔水

王規宣

鶴鳴

王誨宣

祈父

王刺宣

白駒

宣大夫刺

黃鳥

王刺宣

我行其野

王刺宣

斯干

宣王考室

無羊

宣王考牧

卷二十

節南山

幽家父刺王

正月

宣大夫刺王

十月之交

幽大夫刺王

雨無正

幽大夫刺王

卷二十一

小旻

大夫刺
幽王

小宛

大夫刺
幽王

小弁

太子之傅
刺幽王

巧言

刺幽王

何人斯

蘇公刺
暴公

巷伯

寺人刺
幽王

卷二十二

谷風

刺幽王

蓼莪

刺幽王

大東

刺亂

四月

大夫刺
幽王

北山

大夫刺
幽王

無將大車

大夫悔
將小人

小明

大夫悔仕
於亂世

鼓鐘

刺幽王

楚茨

王刺幽

信南山

王刺幽

卷二十三

甫田

王刺幽

大田

王刺幽

瞻彼洛矣

王刺幽

裳裳者華

王刺幽

桑扈

王刺幽

鴛鴦

王刺幽

頻弁

諸公刺幽王

車牽

大夫刺幽王

青蠅

大夫刺幽王

賓之初筵

衛武公刺時

卷二十四

魚藻

刺幽王

采菽

刺幽王

角弓

父兄刺幽王

菀柳

刺幽王

都人士

刺衣服無常

采芣

刺怨曠

黍苗

刺幽王

隰桑

刺幽王

白華

周人刺幽王

緜蠻

微臣刺亂

瓠葉

大夫刺幽王

漸漸之石

下國刺幽王

苔之華

大夫閔時

何草不黃

下國刺幽王

卷二十五

大雅

文王

文王受命作周

大明

文王有明德

緜

文王之興本由大王

棧樸

文王能官人

旱麓

受祖

卷二十六

思齊

文王所以聖

皇矣

美周

靈臺

民始附

下武

繼文

文王有聲

繼伐

卷二十七

生民 尊祖

行葦 忠厚

既醉 太平

鳧鷖 守成

假樂 嘉成

卷二十八

公劉

召康公
戒成王

洞酌

召康公
戒成王

卷阿

召康公
戒成王

民勞

召穆公
戒厲王

板

凡伯刺
厲王

卷二十九

蕩

召穆公傷
周室大壞

抑

衛武公刺厲
王亦以自警

桑柔

芮伯刺
幽王

雲漢

仍叔美
宣王

卷三十

崧高

尹吉甫
美宣王

烝民

尹吉甫
美宣王

韓奕

尹吉甫
美宣王

江漢

尹吉甫
美宣王

卷三十一

常武

召穆公
美宣王

瞻卬

凡伯刺
幽王大壞

召旻

凡伯刺
幽王大壞

卷三十二 周頌

清廟

王祀文

維天之命

太平告文王

維清

舞奏象

烈文

成王即政諸侯助祭

天作

先王祀公

昊天有成命

郊祀天地

我將

文王祀於明堂

時邁

巡狩告祭柴望

執競

武王祀

思文

稷后配天

卷三十三

臣工

諸侯助祭遣於廟

噫嘻

春夏祈穀於上帝

振鷺

二王之後
來助祭

豐年

秋冬
報

有瞽

始作樂而
合乎祖

潛

季冬獻魚
春薦鮪

雖

禘大
祖

載見

諸侯始見
於武王廟

有客

微子求
見祖廟

武

奏大
武

卷三十四

閔予小子

嗣王朝
於廟

訪落

嗣王謀
於廟

敬之

羣臣進
戒嗣王

小毖

嗣王
求助

載芟

春籍田
祈社稷

良耜

秋報
社稷

絲衣

賓釋尸

酌

大告成
武

桓

類講武
禡

賚

於大封
朝

般

岳巡狩祀四
海

卷三十五

魯頌

駉

公頌僖

有駟

臣頌僖公
有道君

泮水

修頌僖公
泮宮

閟宮

周頌僖公
之能復
宇

卷三十六

商頌

那

湯祀成

烈祖

宗祀中

玄鳥

祀高宗

長發

大禘

殷武

祀高宗

右三百五篇

逸詩六篇

臣等謹案詩緝三十六卷宋嚴粲撰粲字坦叔邵武人嘗官清湘令是書以呂祖謙讀詩記為主而襍采諸說以明之舊說有未安者則別以己意闡發如論大小雅之別特以其體不同較詩序政有大小之說於理為近又

如邶之栢舟舊以為賢人自比聚則以栢舟
為喻國以汎為喻無雄特之人干旌之良馬
四之五之舊以為良馬之數聚則以為乘良
馬者四五輩見好善者之多中谷有推舊以
推之曄乾喻夫婦相棄聚則以歲旱草枯由
此而致離散凡若此類皆深得詩人本意至
音訓疑似名物異同攷證尤為精核非空談
解經者可比也乾隆四十一年四月恭校上

總纂官臣紀昀臣陸錫熊臣孫士毅

總校官臣陸費墀

詩緝

叙

敘曰六經皆厄於傳疏詩為甚我朝歐蘇王劉諸鉅儒
雖擺落毛鄭舊說爭出新意而得失互有之東萊呂氏
始集百家所長極意條理頗見詩人趣味然踈缺渙散
要未為全書蓋詩於人學自為一宗筆墨蹊徑或不可
尋逐非若他經然其流既為騷為選為唐古律而吾聖
人所謂可以興觀羣怨孟子所謂以意逆志者悉付之

明經家艾軒林先生嘗曰鄭康成以三禮之學箋傳古詩難與論言外之旨矣艾軒終身不著書遺言間得於前一輩鄉長老客遊二十年未有印此語者華谷嚴君坦叔早有詩名江湖間甲辰余抵京以同舍生見時出詩緝語我其說大抵與老艾合且曰吾用於此有年非敢有以臆決撫諸家而求其是要以發昔人優柔溫厚之意而已余既竦然起敬遂就求全書而讀之乃知其鈎貫根葉䟽析條緒或會其旨於數章或發其微於一

字出入窮其機綜排布截其幅尺辭錯而理意曲而通
逆求情性於數千載之上而興寄所在若見其人而得
之至於音訓疑似名物異同時代之前後制度之纖悉
訂證精密開卷瞭然嗚呼詩於是乎盡之矣易盡於伊
川春秋盡於文定中庸大學語孟盡於攷亭繼自今吾
知此書與並行也然則華谷何以度越諸子若是哉余
嘗得其舊藁五七言幽深天矯意具言外蓋嘗窮諸家
閫奧而獨得風雅餘味故能以詩言詩此箋傳所以瞠

若乎其後也余曰艾軒惜不見子君曰子又豈容遺艾軒之言故不自揆而為之敘云爾是年十有二月竹溪庸齋林希逸書

二兒初為周南召南受東萊義誦之不能習余為緝諸家說句析其訓章括其旨使之瞭然易見既而友朋訓其子若弟者競傳寫之困于筆劄胥命鋟之木此書便童習耳詩之興幾千年於此矣古今性情一也人能會孟氏說詩之灋涵詠三百篇之性情則悠然見詩人言

外之趣毛鄭以下且束之高閣此書覆瓿可也淳祐戊申夏五月華谷嚴粲序

黍離中谷有蕓葛蟲不用舊說獨能深得詩人優柔之意其他一章一句時出新意大抵宛轉有旨趣再三玩味實獲我心坦叔可與言詩也已矣初還別換一冊幸無我靳甫再拜上啓

附蒙齋袁甫手帖

詩緝條例

集諸家之說為詩緝舊說已善者不必求異有所未
安乃參以己說要在以意逆志優而柔之以求吟詠
之性情而已字訓句義插注經文之下以著所從乃
錯綜新舊說以為章指順經文而點掇之點平聲使詩
人紆餘涵泳之趣一見可了以便家之童習耳

經文及章指並作大字

字訓句義及有所發明並作小注以經文為先後

說雖異而可取者附注焉

小注毛氏稱傳鄭氏稱箋序注元不著姓氏者皆鄭氏說今併稱箋鄭氏詩譜稱譜孔氏稱疏爾雅稱其篇第

如釋鳥釋草之類

爾雅疏稱釋諸家稱氏

凡草木蟲魚之類舊一說分明者先著之其辭繁及說不一者稱曰以斷之

所引諸家諸書皆稱曰其諸家諸書所引則稱云經文音釋注本句之下諸說音釋附本說之下

直音多假借以便初學不拘本韻其切字以溫公切韻指掌圖正之

凡上聲濁音讀如去聲俗讀作上聲清音非

四聲皆有清濁

唯上聲濁音與去聲相近如咒字乃上聲與去聲寺字音相近雖係上聲只讀如寺不必讀作死蓋咒乃徐履反徐字屬斜字母用錫涎切係半濁半清按溫公圖其四聲平為詞上為咒去為寺此是重道如讀作死乃屬心字母用新先切係全清誤矣凡上聲濁音及半清半濁音皆與去聲相近讀者多作上聲則以濁為清矣

釋文有音切不和者今以韻書為定

凡音不言下同省文也

一詩內
皆同

下文音不同者別出

古注音義不同者先著所從其不從者附見之

題下一句國史所題為首序其下說詩者之辭為後
序

別詩及他書字訓與本詩字訓同者直引以相證不

復著語

如蓼蓼者莪直
引蓼彼蕭斯

欽定四庫全書薈要卷一千

經部

詩緝圖說

清濁音圖

辯音上濁者
讀如去聲

全清次清全濁不清不濁為清濁四音

全清

東弓包居逋鳩金顛邊賓知

次清

通穹胞肱鋪丘欽天篇繽癡

全濁

同窮庖渠酺求琴田駢頻持

不清不濁

農顓茅魚模牛吟年眠珉尼

平上去入四聲其平聲為全清者其上去入皆為全清其次清全濁不清不濁者亦然

全清 次清 全濁 不清不濁

平 東 通 同 農

上 董 桶 動 讀如
去聲 穰

去 凍 痛 洞 鰾

入 督 禿 獨 有聲
無字

四聲唯上聲全濁者讀如去聲謂之重道如同動

洞獨動洞是重道蓋四聲皆全濁也動字雖是上聲以其為上聲濁音只讀如洞字今人調四聲者誤云同桶痛禿不知同為全濁其桶痛禿皆為次清清濁不倫矣


動奉棒是兇婢被否市恃士仕砒俟涖似已祀耜
汜似巨秬虛距炬叙緒嶼鱖茅蕒佇佇杼紵荳輔
父腐柱簿部杜戶怙枯岵戍陞蟹亥待逮殆怠倍
在牝混但緩踐儗善趙肇兆旒紹皓昊顥鎬浩皐

抱道穉早造坐象丈蕩杏荇靜靖迴洞舅婦阜厚
後甚儉焚簞檻范範犯軋

以上之類並是上聲全濁讀如去聲

溫公指掌圖又有蹤擬從嵩松五音內嵩為全清
松為半清半濁今圖止為辯上聲全濁故但取四
音言之

十五國風地理圖



周南召南地在雍州之城岐山之陽於漢屬扶風美陽
縣皆周之舊土文王受命後以賜二公為采地邶鄘衛
河南地本殷舊者唐分其畿內為三國也王國東都洛
陽今之河南西京鄭今河南新城皇滎陽潁川之東高
陽之地齊青州岱山之陰濰淄之野魏自高陵以東盡
河東河內南有陳留晉冀州太行常山之西太原太岳
之野陳古豫州之界今陳州宛丘縣秦自弘農故闕而
西京兆扶風馮翊北地上郡西河安定天水隴西西有

巴蜀廣漢捷為武都西北有金城武威張掖酒泉燉煌
西南有牂牁越巂及益州檜豫州外方之北滎波之南
溱洧間今滎陽密縣東北曹兗州陶丘之北荷澤之野
今興仁府濟陰縣幽今之邠州栢邑魯兗州仙源縣禹
貢徐州大野家羽之野

欽定四庫全書薈要卷一千一

經部

詩緝卷一

宋嚴粲撰

周南

國風

譜曰周南者禹貢雍州岐山之陽地名今屬右扶風美陽縣太王避狄難自豳始遷焉商王帝乙之初命其子王季為西伯至紂又命文王典治南國江漢汝旁之諸侯文王作邑於豐乃分岐邠周召之地為周公旦召公奭之采地武王定天下巡狩述職陳誦諸國之詩以觀民風俗得二公之德教尤純屬之太師分而國之謂之周南召南周公作樂用之鄉人焉用之邦國焉或謂之房中之樂者后妃夫人侍御於其君子女史歌之周公封魯召公封燕元子世之其次子亦世守采地在王官春秋時周公召公是也采音菜○疏曰縣言太王遷於

周原召是周內之別名也。春秋時周公召公別於東都受采存本周召之名也。○朱氏曰：國者諸侯所封之域，而風者民俗歌謠之詩也。謂之風者，以其被上之化，以有言而其言又足以感人，是以諸侯采之以貢於天子。天子受之而列於樂官，於以考其俗尚之美惡，而知其政治之得失焉。舊說：二南為正風，所以用之閭門鄉黨邦國而化天下也。十三國為變風，則亦領在樂官以時存肄備觀省而垂監戒耳。○又曰：周國名南，南方諸侯之國也。岐周在今鳳翔府岐山縣，豐在今京北府鄆縣終南山北，南方之國即今興元府京西湖北等路諸州。鎬在豐東二十五里，其言文王之化者，繫之周公以周公主內治故也。其言諸侯之國被文王之化以成德者，繫之召公以召公長諸侯故也。鄆音戶。○補傳曰：國風終於美，周公二雅終於思，召公則聖人刪詩之際，蓋傷衰亂之極，非周召不能救也。

關雎

音趨○臣桀曰雎七胥反以溫公切韻圖正之七字在第十八圖屬清字母胥字在第三圖平聲第

四等橫尋清字得疽字其上聲為取去聲為覲則平聲正音趨也雎疽疽皆同音俗讀為沮之平聲非也後

皆類

后妃之德也

李氏曰后妃大姒也○朱氏曰大姒未嘗稱后此追稱之云耳此詩當時

人所作以美大姒之德周公取以為周南之首篇以教天下後世以明凡為后妃者其德皆當如是也故序者

不曰美大姒之德風之始也

朱氏曰謂國風篇章之始亦風教之所由始

以風天下而正夫婦也

疏曰所以風化天下之民故用而使之皆正其夫婦焉

之鄉人焉

疏曰令鄉大夫以之教其民也儀禮鄉飲酒禮者鄉大夫三年賓興賢能之禮其經云乃

合樂周南關雎是用之鄉人也○補傳曰近而用以化六鄉之人

用之邦國焉

疏曰令諸侯以

之教其臣也燕禮者諸侯飲燕其臣子其經云遂歌鄉樂周南關雎是用之邦國也○補傳曰遠而用以化六國服之

右第一節論關雎之化

美后妃之德所以見文王之德也故又言此文王風化之始所以風天下而正夫婦皆主文王言之非專美后妃也治天下自齊家始善則天下陰蒙其福而人不知否則國家潛受其蠹而主不悟夷考千載理亂之故常必由之詩首關雎淵乎哉

釋文曰舊說云后妃之德也至

用之邦國焉名關雎序謂之小序自風風也訖末名
大序沈重云按鄭詩譜意大序是子夏作小序是子
夏毛公合作卜商意有不盡毛更足成之或云小序
是東海衛敬仲所作今謂此序止是關雎之序總論
詩之綱領無小大之異○蘇氏曰大序其文反覆煩
重類非一人之辭者凡此皆毛氏之學而衛宏之所
集錄也後漢儒林傳云衛宏從謝曼卿受學作毛詩
序善得風雅之旨至今傳于世隋經籍志云先儒相
承謂詩序子夏所創毛公及衛敬仲又加潤益○董
氏曰宏固不能及此或以師授之言論著於書耳

風風也

風竝如字徐上如字下去聲

教也風以動之教以化之

右第二節論名風之義

風有二義風之優柔以感動其善心教之諄勤以變

化其氣習

朱氏曰如風之著物鼓舞震盪物無不化而不知為之者

詩者志之所之也

疏曰之適也

在心為志發言為詩情動於

中而形於言言之不足故嗟歎之

數本亦作嘆

嗟歎之不足

故永歌之永歌之不足不知手之舞之足之蹈之也

右第三節論詩出於人情之真

此更端泛說詩也詩者志之所適特蘊藏在心則為志發見於言則為詩耳名二而實一也蓋詩由所感而作不能自己出於人情之真而非偽也舉手而舞

動足而蹈身為心使不自覺也虛一而靜者心也言
心之所主則謂之志言心之感於物而有喜怒哀樂
之殊則謂之情

情發於聲聲成文謂之音

疏曰樂記注云雜比曰音單出曰聲哀樂之情發見於言

語之聲於時雖言哀樂之事未有宮商之調唯是聲耳
至於作詩之時則次序清濁節奏高下使五聲為曲似
五色成文即是為音此音被諸絃管乃名為樂審
聲以知音審音以知樂對文則別散則通比音備治世

之音安以樂

音洛

其政和亂世之音怨以怒其政乖亡國

之音哀以思

音四

其民困

右第四節論聲音與政通

音由人心生也心有感而聲自形聲相應而音自備

所感不同政使然也

黃氏曰凡此不可專以言辭求之若徒觀其言辭而不達其聲

音則大田楚茨之詩不言周政之衰而言先王之盛亦可謂治世之音乎

故正得失動天地感鬼神

疏曰鬼神與天地相對則唯謂人鬼耳

莫近於詩

右第五節論詩貫幽明

詩出於情之真其感也深故正人事之得失使人捨非而從是與夫動天地感鬼神無有近於詩者吾心

有此理在人在天地在鬼神亦同此理以此理之同者正之動之感之何遠之有正得失通上下言之

朱氏

曰和平怨怒之極又足以達陰陽之氣而致災召祥蓋出於自然

先王以是經夫婦

朱氏曰先王指文武周公成王○疏曰經常也成孝敬

朱氏曰孝

者子之所以事父敬者臣之所以事君詩之始厚人倫作多發於男女之間而達於父子君臣之際

美教化移風俗

右第六節論先王用詩以化天下

詩首二南故先言經夫婦夫婦之道貴乎有常以詩

經之子事父以孝臣事君以敬秉彝之心欲其勿虧
以詩成之三綱正則人倫厚故教化美而風俗移詩
教皆為人倫設也

故詩有六義焉一曰風二曰賦三曰比四曰興去聲五曰
雅六曰頌

右第七節論六義

詩之名三曰風雅頌此以風雅頌偕賦比興言之謂
三百篇之中有此六義非指詩名之風雅頌也。孔

氏謂風雅頌皆以賦比興為之非也大序之六義即周官之六詩如孔氏說是風雅頌三詩之中有賦比興之三義耳何名六義六詩哉凡風動之者皆風也正言之者皆雅也稱美之者皆頌也故得與敷陳之賦直比之比感物之興竝而為六也呂氏言得風之體多者為國風得雅之體多者為二雅得頌之體多者為頌風非無雅雅非無頌其說是也若謂三詩之中止有三義則比興之外餘皆為賦然不忤不求何

用不臧此於六義為雅不當謂之賦稱彼兕觥萬壽

無疆此於六義為頌亦不當謂之賦

程子曰國風二雅三頌詩之名

也六義詩之義也風者謂風動之也賦者謂鋪陳其事也此者直比之興者因物而起雅者正言之頌者稱美之六義隨篇求之有兼備者有偏得其一二者○張子曰一詩之中有兼見風雅頌之意賦比興亦然○補傳曰國風雅頌蓋於六義之中取其體之大者而名之

上以風化下下以風刺上

風音諷

主文而譎諫

譎音決○臣桀曰譎

詭也言之者無罪聞之者足以戒故曰風

右第八節論風之正變

上之人用此以風化其下謂正風也下之人用此以諷刺其上謂變風也主文者謂主於文辭成章可歌使人玩其辭而樂之蓋詩主文而春秋主事也既使人玩其辭而樂之因以寓其諷諫或託物或陳古言在於此意寓於彼詭辭以諫而不斥言其失言之者所以無罪聞之者亦足自戒上之化下下之諷上皆有優游巽入之義故正風變風皆名為風

至于王道衰禮義廢政教失國異政家殊俗而變風

變雅作矣

疏曰以其變改正法故謂之變焉

國史明乎得失之迹

疏曰

國史者周官大史小史外史御史之等皆是也○曹氏曰小史掌邦國之志外史掌四方之志說者云志記也國史既掌邦國四方之圖籍則舊章民風無不通習詩采得之後屬之國史故楚左史倚相問祈招之詩而不知則右尹傷人倫之廢哀刑政之苛吟詠子革非之招音韶

傷人倫之廢哀刑政之苛吟詠

情性

疏曰吟詠己之情性者詩人也非史官

以風其上

風音諷

達於事變

而懷其舊俗者也

右第九節論變風變雅之所以作

王道以禮義為大端而政教之所自出也自文武成
康之道衰禮義既廢政教遂失王政不行不能一道
德而同風俗於是變風變雅始作矣古者有采詩之
官其巡守也命太師陳詩以觀民風采得之後屬之
國史國史明得失之迹謂知詩人所言之意也知其
意在於哀傷人倫刑政之失發於情性而吟詠之以
風刺其上蓋通達古今之變而思其先王之舊也此
皆詩人之意唯國史能明之故題其事迹於篇端也

程子曰國史知得失之迹載其事於篇端然後其義可知今小序之首是已其下乃說詩者之辭而後人所附或有失詩之意者或謂國史自作詩亦或有如此者不必盡是自作要之詩皆國史主之也○朱氏曰舊說正風正雅皆文武成王時詩周公所定樂歌之辭變風變雅皆康昭以後所作然正變之說經無明文可考今姑從之○臣桀曰懿王風始變厲王雅始變今無康昭變詩

故變風發乎情止乎禮義發乎情民之性也

朱氏曰情者性之動

而禮義者性之德也性則天命之在我者也

止乎禮義先王之澤也

右第十節又獨論變風

此申說吟詠情性之意變風發乎喜怒哀樂之情以

風刺其上出於性也言性動而之情也其言止乎禮
義而不失其性之德則由於先王教化之澤淪浹於
人心者未泯也夫人之怨怒哀思易為血氣所亂往
往流於情之過而失其情之正非教化入人者深何
以能止於禮義邪

是以一國之事繫一人之本謂之風言天下之事形四
方之風謂之雅

朱氏曰形者體而象之之謂

雅者正也言王政之所

由廢興也

右第十一節論風雅之別

諸侯之詩為風天子之詩為雅風言國俗所漸各不同也雅言天子所以齊正萬方使歸於一也正之之道有得失故廢興異焉

補傳曰風者由其下之俗而知其君雅者由其上之政而

知其民○永嘉陳氏曰風詩由下以觀上多作於小夫賤隸皆因民俗厚薄推本於一人之善惡也雅詩由上以知下多作於公卿大臣皆以朝政臧否推廣而達之四方之理亂也

政有小大故有小雅焉有大雅焉

右第十二節論大小雅之別

以政之小大為二雅之別驗之經而不合李氏以為
大序者經師次輯其所傳授之辭不能無附益之失
其說是也然二雅之別先儒亦皆未有至當之說竊
謂雅之小大特以其體之不同耳蓋優柔委曲意在
言外者風之體也明白正大直言其事者雅之體也
純乎雅之體者為雅之大雜乎風之體者為雅之小
今考小雅正經存者十六篇大抵寂寥短簡其首篇
多寄興之辭次章以下則申複詠之以寓不盡之意

蓋兼有風之體大雅正經十八篇皆春容大篇其辭
旨正大氣象開闊不唯與國風異然不同而比之小
雅亦自不侔矣至於變雅亦然其變小雅中固有雅
體多而風體少者然終有風體不得為大雅也離騷
出於國風其文約其辭微世以風騷竝稱謂其體之
同也太史公稱離騷曰國風好色而不淫小雅怨誹
而不亂若離騷者可謂兼之言離騷兼國風小雅而
不言其兼大雅見小雅與風騷相類而大雅不可與

風騷竝言也詠呦呦鹿鳴食野之苹便會得小雅興趣誦文王在上於昭于天便識得大雅氣象小雅大

雅之別則昭昭矣

臣考菁莪毓材棫樸官人所言之事同也然菁莪之詩惟反覆吟詠

於菁莪之莪是有風體而不純乎雅故為小雅至棫樸之詩言左右奉璋髦士攸宜周王于邁六師及之周王壽考遐不作人勉勉我王綱紀四方皆正言其國其辭旨氣象與菁莪大有間矣故為大雅此大雅小雅正經之別其餘皆可類推也以變雅言之六月采芑常武江漢皆述宣王征伐之事而六月采芑其體與采薇出車杕杜不甚相遠比之江漢言江漢浮浮武夫滔滔匪安匪遊淮夷來求常武言赫赫明明王命卿士南仲大祖太師皇父氣象小大自是不同季札觀樂至歌小雅曰怨而不言至歌大雅曰廣哉

熙熙乎此善言二雅之氣象者也至以大雅為曲而有直體却正說著小雅小雅兼有風體故曲而有直體若大雅之體安有所謂曲杜預知其說之不通乃曰此論其聲蓋謂非論其體也

頌者美盛德之形容

疏曰謂形狀容貌也

以其成功告於神明者

也

告音恪○臣粲曰鬼神之神理隱而顯故曰神明

右第十三節論頌

盛德先王先公之德也成功先王先公所以創業垂統而授之子孫者也今也德積而至於配天功積而至於太平作頌者美盛德之形狀歌其成功徧告神

明所以報神恩也此解周頌也詩三百篇皆周詩也

魯商頌附焉耳

疏曰商魯之頌則異於是商頌雖是祭祀之歌祭其先王之廟述其生時

之功正是死後頌德非以成功告神其體異於周頌也魯頌詠僖公功德纔如變風之美者耳又與商頌異也

是謂四始

李氏曰關雎者風之始也鹿鳴者小雅之始也文王者大雅之始也清廟者頌之始也

詩之至也

曹氏曰四者皆始於文王故謂之四始以其德之不可以復加矣孔子云周之德其可謂

至德也已

右第十四節論四始

詩之至也猶曰易其至矣乎贊美不盡之意文王之

德雖甚盛蔑加矣

然則關雎麟趾之化

朱氏曰言化者化之所自出也

王者之風

陳氏曰岐東之

地宗周在焉故為王者之風

故繫之周公

曹氏曰周即美陽之周原太王之舊都也

南言

化自北而南也

疏曰文王之國在於岐周東北近於紂都西北迫於戎狄故其風化南行也漢

廣序云美化行乎江漢之域是從岐周被江漢之域也○朱氏解見周南之下

鵲巢騶虞之德

朱氏曰言德者蒙化以成德也諸侯之風也

陳氏曰岐西之地為召公專主諸侯之國故為諸侯

風之先王之所以教

朱氏曰先王文王也

故繫之召公

召音邵○曹氏曰召即雍

縣之召亭。○李氏曰：周召之分陝在武王既得天下之後，周南召南雖皆文王之風，化不可繫之於文王，故周公所居之地所得之詩謂之周南，召公所居之地所得之詩謂之召南。周公所得之詩多為文王而作，故言王者之風。召公所得之詩多為諸侯而作，故謂之諸侯之風。雖曰諸侯之風，其實文王教化之所及，故言先王之風。所以教分陝以東，如江漢汝墳，即陝之東也。分陝以西，如江沱，即陝之西也。○疏曰：體實是風，不得謂之為雅。又不可以國風之詩繫之，詩不可棄。周南召南，補傳曰：因二公為王行化，是以繫之二公。正始之道，王化之基。政以為二公采邑至武王克商，又分二公為左右。

右第十五節論二南分繫

詩經首二南見夫婦之倫焉，見王道之端焉。二南繫

周召見君臣之倫焉見文王心術之微盛德之至焉
是以關雎樂得淑女樂音洛以配君子憂在進賢不淫其
色哀窈窕窈音杳窕思賢才而無傷善之心焉是關雎
之義也

右第十六節論關雎之義

孔子言關雎樂而不淫哀而不傷謂過於樂則淫過
於哀則傷后妃求嬪妾之賢而未得則憂而至於輟
轉反側哀而不傷也既得之則樂之以琴瑟鐘鼓樂

而不淫也此序樂得淑女以下經師因孔子之言而增益之耳所謂不淫其色哀窈窕皆非詩之旨也

關關雎鳩

曰關關聲也雎鳩鵲也即郊子所謂雎鳩氏司馬也左傳雎作鵲見昭十七年○釋鳥曰

鵲鳩王鵲○傳曰鳥鵲而有別鵲音至亦作鵲○郭璞曰鵲類今江東呼之為鵲好在江渚食魚○陸璣曰大

小如鵲深目目上骨露幽州人謂之鵲鵲音就○山陰陸氏曰陰陽自然變化論云雎鳩不再匹徐鉉草木蟲

魚圖書云雎鳥常在河洲之上為儔偶更不移處蓋鵲性好時每立更不移處所謂鵲立義取諸此俗云雎鳩

交則雙翔別則立而異處是謂鵲而有別傳云鵲鳥不雙是也○杜預注左傳曰鵲而有別為司馬主法制○

蘇氏曰鳥之鵲者不淫○歐陽氏曰此詩不取其鵲取其別也**在河之洲**朱氏曰河北

名○釋水曰水窈窕淑女傳曰窈窕幽閒也淑善也閒中可居者曰洲音閑○朱氏曰淑女指大姒

也君子好逑好毛如字鄭去聲逑音求○朱氏曰君子指文王○傳曰逑匹也

興也凡言興也者皆兼比興之不兼比者特表之○詩記曰風之義易見惟興

與比相近而難辨興多兼比比不兼興意有餘者興也直比之者比也興之兼比者徒以為比則失其意味矣興之不兼比者誤以為比則失之穿鑿矣毛氏特言興也為其理隱故也今從毛氏例書興以別之

鶚鳥性不再匹立則異處是有別而不淫也又性好踣每立更不移處有幽閒正靜之象焉故以興后妃也睢鳩有關關然之聲在河中之洲遠人之處興后

妃德音聞於外而身居深宮之中也大姒有徽音故以關關興之此窈窕幽閒之善女足以為君子之良匹也言大姒之賢而文王齊家之道可見矣○車牽思得賢女以配君子亦曰德音來括白華刺褻姒以為鼓鐘于宮聲聞于外蓋宮庭雖奧而善惡流傳於外皆不可掩言關關雎鳩在河之洲猶鶴鳴九臯聲聞于野之意也○爾雅家祖郭郭以雎鳩為鶚又云鵽類是雎鳩即鶚也釋文於鵽曰鶚屬於鶚曰鵽屬

鶚屬即是鵠鵠屬即是鶚無別鶚也鵠鶚皆搏擊之

鳥故曰鶚或見經有河洲之言遂以為疑山陰陸氏

云今大鵬翱翔水上扇魚令出沸波攫而食之一名

沸河淮南子所謂鳥有沸波是也以此言之不可謂

鶚鳥不近河洲也○鄒子五鵠備見詩經睢鳩氏司

馬此詩是也祝鳩氏司徒鵠鳩也四牡嘉魚之鵠是

也鵠鳩氏司空布穀也曹風之鵠鳩是也爽鳩氏司

寇大明之鷹揚是也鵠鳩氏司事

鵠音骨
又如字

鶚鳩也

非班

鳩鶯
音學

小宛之鳴鳩與氓詩食桑甚之鳩是也歐陽氏

以居鵲巢之鳩非鴈鳩則又在五鳩之外也

參差荇菜

參初金反差音鴟荇音杏亦作荇行之上濁解見條例○傳曰后妃共荇菜以事宗廟共

音恭

○疏曰

參差然

不齊也

天官

醢人

陳四豆

之實

無

荇菜或殷禮也○釋草曰荇接余○郭璞曰叢生水中

葉圓在莖端長短隨水深淺江東食之○陸璣曰莖白

葉紫赤色正圓徑寸餘浮生水上根在水底大如釵股

上青下白鶯其白莖以苦酒浸之脆美鶯音煮○臣桀

曰參差訓不齊凡菜皆不齊何獨荇也○令池州人稱荇

為若公鬚蓋細荇亂生有

左右流之○疏曰左右嬪妾也

若鬚然詩人之辭不苟矣

左右流之○箋曰后妃共荇

菹必有助之者○臣桀曰流流水也流之謂於流水以

潔之也水流則清故潔之必於流水釋言以流為求令

不窈窕淑女寤寐求之求之不得寤寐思服傳曰寤覺也寐寢也

覺音教○朱氏曰服猶懷也○悠哉悠哉王氏曰悠者思之長也

輾轉反側輾音展○箋曰卧而不周曰輾○疏曰輾轉俱是迴動箋獨以輾為不周者辨其難明反

側卧而不正也

賦也

唯二南舉賦比以見例餘無疑者不書

后妃共俎豆以事宗廟言

參差不齊之荇菜必得左右嬪妾於流水潔之以為

菹故此幽閒之后妃或寤而覺或寐而寢惟欲求左

右之賢也嬪妾不必親潔荇託言求內政之助以見

其不妬忌也方其未得則寤寐思懷之此其所思悠
長故終夜不寐其身輾轉而不安反側而不止也○
楚莊王夫人樊姬曰妾備掃除十有一年矣私捐
衣食求美人而進於王妾所進九人今賢於妾者二
人與妾同列者七人妾豈不欲擅愛專寵哉不敢以
私廢公也樊姬之求美人即太姒求左右之意說者
多謂詩人思得淑女以配君子如車牽之意非也車
牽惡襄姒故思得賢女以代之太姒已為文王妃何

待詩人思得之乎

參荇菜左右采之

采菖傳曰

窈窕淑女琴瑟友之

釋

釋曰廣雅云琴長三尺六寸六分五絃後加文武二絃

○又曰禮圖舊云雅瑟長八尺一寸廣一尺八寸二十

三絃其常用者十九絃頌瑟長七尺二寸廣一尺八

寸二十五絃盡用之○臣粲曰友之親之如朋友也

差荇菜左右采之

○荇音帽○董氏曰荇則以熟而薦也

羹注云菜也疏云用菜雜肉為羹又昏義荇之以蘋藻毛以荇為擇今不從

窈窕淑女鐘鼓

樂之

樂音洛○臣粲曰金旁從童之鐘樂器也金旁從重之鍾酒器也聚也古字鍾通作鍾監本毛詩皆

鐘作

求而得之則以琴瑟親友之以鐘鼓歡樂之亦謂不妬也

關雎三章一章四句二章八句

鄭作五章章四句今從毛

葛覃后妃之本也

補傳曰王業之本在稼穡后妃之本在女功

后妃在父母

家則志在於女功之事躬儉節用服澣濯之衣

澣音緩胡管反

尊敬師傅則可以歸安父母化天下以婦道也

本者務本也國史所題此一語而已其下則說詩者之辭如言在父母家則志在女功之事非詩意也

詩記

曰講師以為在父母家殊不知是詩皆述既為后妃之事貴而勤儉乃為可稱若在室而服女功固其常耳

葛之覃兮

傳曰葛所以為絺綌女工之事煩辱者覃延也

施于中谷

施音異傳曰施移

也中谷谷中也○疏曰施言引蔓移去其根也中谷倒其言者古語皆然

維葉萋萋

傳曰萋萋茂盛

貌黃鳥于飛

曰黃鳥黃鶯也○傳曰搏黍也搏音團○釋鳥曰皇黃鳥○郭璞曰俗呼黃離留○

陸璣云或謂之黃栗留幽州人謂之黃鶯一名倉庚一名鷲黃一名楚雀常以甚熟時來在桑間關西謂之鷲

黃郭云其色鷲黑而黃因名之

集于灌木

傳曰灌木叢木也○釋木曰木族生為灌

其鳴喈

喈

喈音皆○傳曰喈和聲之遠聞也

興之不兼比者也述后妃之意若曰葛生覃延而施
移於谷中其葉萋萋然茂盛當是之時有黃鳥飛集
於叢生之木聞其鳴聲之和喈喈然我女工之事將
興矣黃鳥飛鳴乃春葛初生之時未可刈也而已動
女工之思見念念不忘也先時感事乃幽民艱難之
俗今以后妃之貴而志念如此豈復有一毫貴驕之
習邪味詩人言外之意可以見文王齊家之道矣

葛之覃兮施于中谷維葉莫莫

朱氏曰莫莫茂盛也
張氏曰秋時也
是

刈是獲

刈音又獲音穫○釋文曰韓詩云刈取也○臣

案曰刈從小刀也謂斬而取之○傳曰獲煮之

也為絺為綌

絺音答綌音隙○傳曰精曰絺麤曰綌

服之無數

音亦○傳曰數厭也

又述后妃之意若曰至葛葉莫莫然茂密之時我則

刈取之獲煮之又緝績以為絺綌而服之無有厭數

之心躬親其事知女工勤勞故服之無厭心也○婦

人驕侈之情何有紀極苟萌一厭心雖窮極靡麗耳

目日新猶以為不足也味服之無數一語可見后妃

之德性後世妃后以驕奢禍其俗者皆一厭心為之

也詩人辭簡而旨深矣

補傳曰后妃之善莫先於不妬忌其次則能節儉也

言告師氏

蘇氏曰言辭也春秋傳云言歸于好○傳曰師女師也古者女師教以婦德婦言婦容婦

功○疏曰昏禮云姆纁笄綃衣在其右注云姆婦人五

十無子出而不復嫁能以婦道教人者姆亡候反纁顯

之上聲山買反

言告言歸

張子曰言告言歸猶曰告曰歸也

薄汙我私

笄音雞綃音消

汙音烏

○芣苢傳曰薄辭也○傳曰汙煩也私燕服也

○箋曰煩擗之用功深擗而緣反○釋文曰煩擗猶接

莎也○臣粲曰治汙

薄澣我衣

箋曰澣謂濯之耳衣謂裋衣以下至祿衣裋音

曰汙猶治亂曰亂也

揮祿音豕○疏曰

害澣害否

害音曷否音缶○傳曰害何也

歸寧父母

澣其用功淺也

此章乃說后妃將歸寧之事后妃若曰我告于師氏

其告之者為歸寧也於是汙煩其褻服澣濯其禮服
又有不澣者問其何者當澣而何者可以未澣乎我
將歸而問安於父母也舉動必告於師氏澣衣猶為
之斟酌觀此氣象其賢可見矣朱氏曰此詩見后妃
已貴而能勤已富而
能儉已長而敬不弛於師傅已嫁而孝
不衰於父母是皆德之厚而人所難也

葛覃三章章六句

卷耳

卷音捲

后妃之志也又當輔佐君子求賢審官知臣

下之勤勞内有進賢之志而無險詖私謁之心

詖音秘

朝

夕思念至於憂勤也

言后妃之志者謂因備酒漿念及臣下之勤勞耳後
序以詩之周行為列位遂支離其說非詩之旨也求
賢審官婦人何預果若序言开后妃與政之漸矣朝
夕思念至于憂勤於義為衍

采采卷耳

采莒傳曰采取也。朱氏曰采采非一采也。據本草即今蒼耳今人麴藥中多用之。○釋

草曰蒼耳苓耳。○郭璞曰廣雅云采耳也亦云胡采江東呼常采形似鼠耳叢生似盤采西之上。○陸璣曰葉青白色似胡荽白華細莖蔓生可煮為茹。不盈頃筐。四月中生子如婦人耳璫或謂之耳璫草。

傾○韓詩曰頃筐歌筐也○錢氏曰箱之小嗟我懷人而偏者○荀子曰卷耳易得也頃筐易盈也臣粲曰懷真彼周行○今從毛鹿鳴音如字舊音航○傳矜念也○朱氏曰周行大道也○詩記曰毛氏以為周之列位自左氏以來其傳舊矣然以經解經則不若呂氏之說也

興之不兼比者也此言使臣在途歸必勞之后妃主酒漿之事豫采卷耳以為麴蘖故因見采卷耳者而念使臣之勞謂卷耳易得之草頃筐易盈之器今采卷耳者非難且勞之事也采之又采尚不盈頃筐嗟

乎我終念使臣今在道路其跋涉之勞當如何耶

張子

詩云閨閭誠難與國防默嗟徒御困高岡觥壘欲解痛瘡恨采耳元因備酒漿○經有三周

行卷耳鹿鳴大東也鄭皆以為周之列位唯卷耳可通鹿鳴示我周行破示為寘自不安矣大東行彼周行又為發幣於列位其義尤迂毛以卷耳為列位鹿鳴為至道大東無傳今取毛鹿鳴音義皆為道也但卷耳大東為道路鹿鳴為道義

陟彼崔嵬

音摧桅○傳曰陟升也崔嵬土山之戴石者○釋山曰石戴土謂之崔嵬○疏曰傳與爾

雅正反者或傳寫誤也下解礪同

我馬虺隤

虺音灰隤徒回反傳曰虺隤病也

我姑酌

彼金罍

音雷○傳曰姑且也○疏曰人君以黃金飾尊刻為雲雷之象言

釋文曰罍酒樽也容一

刻則用木矣

維以不永懷

今日懷即上文懷人之懷

后妃念使臣升崔嵬之山其馬亦虺隤而病矣馬勞

且病人勞可知永懷謂念之不忘也使臣他日竣事

而歸我酌酒以勞之乃可以釋我此念今方在途則

我矜念之而不忘也后妃不親酌酒以主酒漿故以

我言之周南著文王之化后妃居深宮之中而能念

及臣下之勞者由其君子能體羣臣故夫婦之志同

也

解頤新語曰周官酒人之奚為世婦役有女酒女漿則知周家酒漿之用亦內治所當察也注奚令

之侍使

官婢

陟彼高岡

傳曰山脊曰岡

我馬玄黃

傳曰玄馬病則黃

我姑酌彼兕觥

兕詞之上濁觥音肱。傳曰兕觥角爵也。○疏曰兕一角青色重千斤以兕角為觥古者宴饗之禮必有兕觥成十四年左傳衛侯饗苦成叔甯惠子曰兕觥其觶旨酒思柔故知饗有兕觥也昭元年鄭人宴趙孟穆叔子皮及曹大夫興拜舉兕觥曰小國賴子知免於戾矣故知宴有兕觥也。○朱氏曰兕野牛也周禮有觥罰之事又云觥其不敬者但謂以觥維以不永傷臣衆曰傷罰之耳不必專為罰爵也

陟彼砠矣

砠音趨與陟同
土曰砠

○釋山曰土戴石為砠

○傳曰石山戴

我馬瘠矣

瘠音

塗○傳曰瘠病也

我僕痡矣

○痡音敷又浦之平
○傳曰痡亦病也

云何吁矣

僕馬皆病而今云何乎長歎而已念其勞也

卷耳四章章四句

樛木

樛音鳩

后妃逮下也

疏曰言以恩意接及其下
衆妾使俱進御於王也

言能

逮下而無嫉妬之心焉

嫉音疾妬都之去

讀此詩想見文王宮庭之雖穆矣

南有樛木

傳曰南南土也木下曲曰樛○箋曰南土謂
荆揚之域○疏曰揚州厥木惟喬○臣粲曰

左傳聲子云如杞梓皮革
自楚往也見南方木美

葛藟纍之

藟音壘纍音縲○
釋文曰藟似葛纍

纏繞

樂只君子

樂只音洛止○
仲氏任只母也

臣粲曰只語已辭也如
楚詞白日昭止是

也樂只君子蓋
曰樂哉君子也

福履綏之

臣粲曰視履考祥之
履○傳曰綏安也

興也南土木美葛藟亦茂故以南言之木之喬竦者

物不得附託而俱升南土有下曲之木故其下葛也

藟也皆得纍而纏繞之喻后妃能以惠下逮衆妾無

妬忌之心則衆妾得以攀附而上進后妃如此樂哉

其夫君子可謂福履安之矣動罔不吉謂之福履

詩記

曰漢之二趙隋之獨孤唐之武后其禍至於亡國則樛木之后妃詩人安得不深嘉而屢歎之乎

南有樛木葛藟荒之

傳曰荒奄也○呂氏曰茫覆也

樂只君子福履將

之箋曰將猶扶助也

南有樛木葛藟縈之

縈烏營反○傳曰縈旋也○錢氏曰遠也

樂只君子福

履成之

傳曰成就也

樛木三章章四句

螽斯

螽音終

后妃子孫衆多也言若螽斯不妬忌則子孫

衆多也

螽斯次樛木義相成也後序謂若螽斯不妬忌非也
螽斯微蟲何由知其不妬忌乎

螽斯羽

曰螽斯蝗也蟄也斯語助也即阜
說音

傳曰說說
衆多也

宜爾子孫振振兮

振音真○杜氏左傳注曰
振振盛也○臣粲曰振振

有二訓盛也信厚也詩言振振者三此詩當
如均服振振之訓為盛麟趾殷雷當為信厚

比也螽蝗生子最多信宿即羣飛因飛而見其多故
以羽言之喻子孫之衆多也歸其本於后妃曰宜乎
爾后妃之子孫振振然而盛也此詩之意全在宜爾

二字風人意在言外見后妃子孫衆多但言宜其如此使人自思其所以宜者何故而不明言之謂由不妬忌而致此也。○今考爾雅云阜螽螻李氏陸璣許氏蔡邕之說阜螽即蝗也螻也螻也螻音特同是一物

爾雅又云螻螽螽螽螽音斯螽音嵩須此別是一物蝗之類

也螽斯即阜螽非螻螽也毛氏誤以此螽斯為螽螽孔氏因之遂以螽斯螽為一物錢氏云阜螽螽飛齊一故以為比斯語助猶鴛斯鹿斯也言羽見其飛

也春秋書螽斯即蝗也蘇氏謂螽斯一生八十一子朱氏云一生九十九子今俗言蝗一生百子不必以定數言之但以生子多者莫如蝗耳

螽斯羽薨薨兮

薨音轟○朱氏曰薨薨羣飛聲

宜爾子孫繩繩兮

蘇氏抑解

曰繩繩不絕也○臣粲曰如繩之牽連不絕

螽斯羽揖揖兮

揖子立反又音戢○傳曰揖揖會聚也○呂氏曰螽斯始化其羽詵詵然比次

而起已化則齊飛薨薨然有聲既飛復斂羽揖揖然而聚

宜爾子孫蟄蟄兮

蟄尺十反徐直

立反○傳曰蟄蟄和集也

螽斯三章章四句

桃夭

音腰

后妃之所致也不妬忌則男女以正昏姻以時

疏曰標有梅傳云三十之男二十之女不待禮而行之則男女以正謂男未三十女未二十女自十五至十九男自二十至二十九也東門之楊傳云男女失時不逮秋冬則秋冬嫁娶正時也鄭以三十之男二十之女仲春之月為昏是禮之正法○臣粲曰昏姻之時當從毛氏解見東門之楊此序男女以正止謂以禮嫁娶昏姻以時謂及國無鰥民也鰥音關盛年耳

經但言男女以正昏姻以時而序者推原於后妃之

不妬忌蓋知風之自矣

廣漢張氏曰乖爭之風始于閨門至於使萬物不得其所

而況昏姻之能以時乎此意蓋深遠矣

桃之天天

傳曰天天其少壯也○臣粲曰棘心天天與書厥草惟天皆少長之意物少則長而未已

灼灼其華

曹氏曰灼灼鮮明貌○臣粲曰毛以為華之盛謂盛故鮮明非訓灼灼字為盛也

之子于歸

傳曰之子嫁子也于往也○釋文曰婦人謂嫁曰歸

宜其室家

興也天天以桃言指桃之木也灼灼以華言指桃之

華也桃之天天灼灼其華取相錯成文也言桃之少

壯故其華鮮明木少壯則其華盛譬婦人盛年則容

色麗也此行嫁之子往歸于夫家則男有室女有家

夫婦皆得其宜也

桃之夭夭有蕢其實

蕢音焚。傳曰蕢實貌。李氏曰桃之少壯則結實必大其葉亦蓁

蓁然盛若非少壯則雖結實不復大雖有葉不復蓁蓁矣此言婦人得盛時而嫁也。○臣粲曰蕢大也墳為大防鼓鼓為大鼓有頌其首用宏茲蕢皆訓為大之子于凡蕢同音之字皆為大義則蕢亦桃實之大貌

歸宜其家室

桃之夭夭其葉蓁蓁

音榛。傳曰蓁蓁至盛貌之子于歸宜其家人

不特夫婦相宜而一家之人盡以為宜言其能協和而使無間言也閨門雍穆風俗淳美豈非后妃之化

歟

詩記曰既詠其華又詠其實又詠其葉非有他義蓋餘興未已而反覆歌詠之耳

桃夭三章章四句

兔置

音嗟

后妃之化也關雎之化行則莫不好德

好去聲

賢

人衆多也

詩人因見兔置之人處賤事而能敬便知其材之可

用序者因詩人美兔置之賢便知當時多好德之賢

又便知其為關雎之化非知類通達者未可與言詩

也能敬即是好德

廣漢張氏曰和平之風至於使兔置之人亦興其好德之彞性則固

有不言而信不疾而速者其
要特在於修身以齊家而已

肅肅兔置

傳曰肅肅敬也兔置

楸之丁丁

耕反音卓丁陟

○傳曰丁丁楸杙聲也杙音弋槩也槩音掘○疏曰此
丁丁連楸之○今曰伐木丁丁為聲之相應此丁丁亦

為連赳赳武夫

赳音九○傳曰赳赳武貌

公侯干城

干如字舊音扞朱氏曰此文

王時周人之詩極其尊稱不過曰公侯而已亦文王未
嘗稱王之一驗也凡雅頌稱王者皆追王後所作耳

箋曰干也城也皆以禦難也○孫炎曰干楸所以自
蔽扞也○楸食允反○疏曰扞蔽如盾防守如城然

賦也詩人偶見有肅肅然恭敬者乃作置捕兔之人

楸伐杙槩其連楸之聲丁丁然為賤事而能敬可以

知其賢矣遂美此兔置之人赳赳然其武可為公侯

之干與城言勇而忠也

李氏曰冀缺耕於野夫婦相敬如賓胥臣薦之於文公茅

容避雨危坐郭林宗見而異之

肅肅兔置施于中逵

施如字逵音葵○傳曰逵九達之道

赳赳武夫公侯

好仇

好朱如字鄭去聲○朱氏曰好仇善匹也○錢氏曰仇與逵通○臣桀曰公侯好仇與君子好逵句

法同善匹猶率由羣匹之匹

此赳赳之夫可為公侯之善匹言勇而良也

肅肅兔置施于中林

傳曰中林林中赳赳武夫公侯腹心

中達人所見之地肅肅可也以中林無人之地猶且
恭敬則其賢可知也此赳赳之夫可為公侯之腹心
謂機密之事可與之謀慮言勇而智也詩記曰其辭
浸重亦數美
無已之
意爾

兔置三章章四句

采芣

音浮以

后妃之美也和平則婦人樂有子矣

樂音洛
楊氏

曰后妃無嫉妬之心則和平矣惟其和平
故天下化而和平則婦人以有子為樂矣

天下和平為后妃之美家齊而國治國治而天下平

矣

采采芣苢

傳曰采取也。朱氏卷耳解曰采采非一采也。釋草曰芣苢馬舄馬舄車前。郭璞曰

今車前草大葉長穗好生道邊江東呼為蝦蟆衣。陸璣曰其子治婦人難產。山陰陸氏曰神仙服食法云

令人有子亦謂之陵舄列子云薄言采之程子曰薄言生於陵屯則為陵舄屯阜也發語辭。臣

桀曰薄言震之薄言追之薄言采采芣苢薄言有之言采芣凡薄言二字皆辭也

賦也芣苢宜懷妊故婦人有子則采之采采非一采

矣而又采之喜樂之深也有言采而得之為已所有也此詩無形容譬喻之辭讀之自見喜意

采采芣苢薄言掇之

掇端之入。傳曰掇拾也。

采采芣苢薄言撝之

撝鑿之入。朱氏

曰撝取其子也。

采而聚之於地既為已有於是就地掇拾之既掇拾之則撝取其子

采采芣苢薄言袪之

袪音結。傳曰袪執袪也。采采芣苢

薄言禡之

禡音頤。傳曰禡。袪音揅。袪曰禡。袪音揅。

既撝取其子則以衣貯之而執其袪謂之袪既執其袪及掇其袪於帶中謂之禡自采至禡言之序也

采芣三章章四句

漢廣德廣所及也文王之道被于南國美化行乎江漢之域無思犯禮求而不可得也

道謂修身齊家之道也男子見游女自無犯禮之思後序言求而不可得非也

南有喬木

南解見樛木傳曰喬上竦也

不可休息漢有游女

李氏曰漢水出

興元府嶓冢山至漢陽軍大別山入江○又漢入江解見江漢○曹氏曰漢上之游女非深居於重閨之中者

不可求思

傳曰思辭也○項氏曰思語辭或用之句首如思齊大任

漢

之廣矣不可泳思

釋水曰潛行為泳。郭璞曰水底行也。

江之永矣

朱氏曰江

水出永康

不可方思

釋言曰方汍汍音孚亦作桴。○孫炎曰方水中為汍。後論語注云編

軍岷山

竹木曰筏。小曰桴。○今曰江水尤深濶。於漢故漢止言不可泳而江言不可方。

興也南方之木美故以南言之木下蟠則陰廣上竦

則陰少南有喬竦之木其陰不下及故不可休息興

女之高潔而不可求也漢水之上有游行之女非士

君子之族深居閨閣之中者也以小家女而在曠僻

可動之地見者自無狎暱之心於是陳其不可得之

辭如漢水之廣不可潛行而泳之江水之長不可乘
泝而方之見其正潔之意使人望之而暴慢之志不
作矣詩人偶見漢上游女人無陵犯之心知紂之淫
風已變由文王風化所及故假此游女以起義耳

翹翹錯薪

翹音喬○錢氏曰翹翹高竦貌○傳曰錯雜也

言刈其楚

疏曰楚木名故學記

注以楚為荆王風鄭風皆云不流束楚是也楚在雜薪中尤翹翹

之子于歸言秣其馬

秣音末○傳曰秣養也六尺以上曰馬○說文曰秣食馬穀也

漢之廣矣不可泳思江

之永矣不可方思

翹翹然而高者錯雜之薪也其中之楚木尤翹翹然人所先刈也喻衆女之中尤高潔者人所先取也故言此游女之嫁人將有秣馬以禮親迎之者豈可以非禮犯之哉於是復陳其不可得之辭○或謂秣馬如所謂雖為執鞭猶忻慕焉如此則敢請子珮已有狎暱之想矣

翹翹錯薪言刈其萋

音閭。郭璞曰萋萋蒿也。生下田。初生可啖。江東用羹魚也。○陸璣

曰其葉似艾白色長數寸高丈餘好生水邊及澤中正月根芽生旁莖正白食之香而脆美其葉又可蒸為茹

○釋草曰購蔕蔕購音構蔕音商○舍人曰購一名蔕蔕

之子于歸言秣其駒

傳曰五尺

以上曰駒○說文

漢之廣矣不可泳思江之永矣不可

方思

漢廣三章章八句

汝墳

音汾

道化行也文王之化行乎汝墳之國婦人能閔

其君子猶勉之以正也

文王三分有二不替事殷之小心故當時化之雖汝墳婦人亦勉其夫以從王事此文王道化之盛也

導彼汝墳

傳曰遵循也汝水名也○李氏曰汝水出汝州魯山東南至蔡州襄信入淮周南之水也

○釋丘曰墳大防○疏曰謂崖岬狀如墳墓

伐其條枚

傳曰枝曰枚

未見君子

惄如調饑

惄音溺調音周○傳曰惄饑意也調朝也○箋曰惄思也

賦也君子從役於外其妻為樵薪之事遵循汝水之

墳岸伐其枝條枚幹念其君子之未見惄然如朝饑

之切也親伐薪則庶人之妻也

遵彼汝墳伐其條肄

音異○傳曰肄餘也斬而復生既曰肄○程子曰伐肄見踰年矣

見君子不我遐棄

前伐其條枚令生肄而復伐之見行役之久也他日已見君子庶幾不遠棄我也

魴魚赭尾

魴音房赭音稱○曰魴鰓也鰓音鞭解見陳衡門○傳曰赭赤也魚勞則尾赤○張子曰

謂水淺魚搖尾多則血流注尾故尾赤也○呂氏曰鯉尾赤魴尾白今魴尾亦赤則勞甚矣

王室如

燬

音毀○曰王室商室也○傳曰燬火也

雖則如燬父母孔邇

臣粲曰婦人指其夫

之父母從箋疏義也或以為指文王今不從○傳曰孔甚也邇近也

魴尾本白以勞故赤婦人喻其君子勞苦而容瘁由王室之事其急如火不可緩也是時商王尚存西伯

之事皆幹蠱王室也婦人從而勉其君子曰王室之事雖急如火不得少休然父母相去不遠不必念家而怠王事也魴魚賴尾閔之也父母孔邇勉以正也子于役而念父母情之至切其妻乃復權恩義之輕重欲其國爾忘家可謂正矣○舊說以如燬喻紂之酷以父母喻文王之仁刻畫如此固非以服事殷者所敢安而亦烏在其為勉以正也韓詩以為思親列女傳以為其妻恐其懈於王事蓋近之矣

汝墳三章章四句

麟之趾關雎之應也關雎之化行則天下無犯非禮雖
衰世之公子皆信厚句如麟趾之時也

應效應也公子指周南國君之子公子生長富貴未
嘗憂懼況當殷末俗流世敗之時宜其驕淫輕佻也
今乃信厚豈非關雎風化之效歟公子猶信厚則他
人可知程子曰麟趾不成
辭言之時謬矣

麟之趾

麟者仁獸也瑞獸也○陸璣曰麋身牛尾馬足
黃色圓蹄一角角端有肉不履生蟲不踐生草

不羣居不侶行不經陷穽不罹羅網王者至仁乃出令并州界有麟大小如鹿非瑞應之麟故司馬相如子虛賦曰射麋脚麟謂此麟也注脚謂持其脚也○曹氏曰說文云麒麟獸也麋北麒麟也麟大牝鹿也則字當作麋音同○傳振振公子也○振振有考見螽斯于嗟麟

兮于音吁○臣粲曰于古注無音今考韻于字通作吁注云詩于嗟用此知當音吁也

興也有足者宜跼音第躡也莊子云馬相怒則分背相跼唯麟之足可

以跼而不跼是其仁也今振振然信厚之公子有貴

勢而不恃遂歎美此公子即麟也此詩之辭寂寥簡

短三歎而有餘音也麟之趾指麟言也于嗟麟兮指

公子言也猶楚狂接輿稱孔子為鳳兮也

麟之定

丁之去○傳曰定題也○說文曰題額也

振振公姓

王氏曰公姓公孫也孫傳姓者

也于嗟麟兮

有額者宜抵唯麟之額可以抵而不抵也公室子孫其傳彌遠而信厚不替也

麟之角振振公族

傳曰公族公同祖也

于嗟麟兮

有角者宜觸唯麟之角可以觸而不觸

朱氏曰關雎葛覃卷耳

木蠹斯其詞雖主於后妃其實則皆所以著明文王身修家齊之效也至於桃夭兔置采芣則家齊而國

治之效漢廣汝墳則以南國之詩
附焉而見天下已有可平之漸矣

麟之趾三章章三句

詩緝卷一

謹案清濁音圖第七頁前四行巨拒虞刊本虞訛
虛今改

卷一第一頁前五行乃分岐邦周召之地刊本分
訛命據詩譜改

第一頁前六行得二公之德教尤純案詩譜得字
上有六州者三字疑此脫

第二頁前六行而使之皆正其夫婦焉刊本之訛
其據毛詩疏改

第三頁前二行是東海衛敬仲所作刊本仲訛重
據後漢書衛宏傳改

第三頁前四行後漢儒林傳刊本訛作東漢經籍
志據後漢書改

第六頁後一行此於六義為雅刊本此於訛於此
今改

第十頁後八行不言其兼大雅刊本其字訛在兼
字下今改

第十四頁前三行即郊子所謂鴟鳩氏司馬也刊
本氏訛在司馬下據昭十七年左傳改

第十六頁後三行卧而不周曰輶刊本而訛以據
毛詩箋改

第二十三頁後一行石山帶土曰礪刊本石山訛
山石據毛詩傳改


第二十六頁前七行八行徐直立反刊本脫立字
據經典釋文增

第二十八頁後四行赳赳武貌刊本脫一赳字據

毛詩傳增

第三十一頁後二行方水中為泔筏刊本泔訛譌
據毛詩爾雅疏引孫炎說改

第三十五頁後五行音第蹋也刊本也訛者今改



總校官庶吉士臣侍朝

校對官中書臣潘奕雋

謄錄監生臣符國琛